

Wali Mbeti ti Nzapa - Wives Scriptures

Ephèse 5:22-24 Aouali, i ma tene ti akoli ti i mveni, legueoko tonga na i ma tene ti Seigneur. 23 Teti koli a yeke li ti ouali, legueoko tonga na Christ A yeke Li ti Eglise, teti Lo mveni A yeke Sauveur ti Tele. 24 Mais legueoko tonga na Eglise a ma tene ti Christ, tonga so djia aouali a ma tene ti akoli ti ala na ya ye koue.

Ephèse 5:31 Teti tene so, fade jo a djia baba na mama ti lo, na lo douti na ouali ti lo; na fade ala osse a ga mi-tele oko.

Ephèse 5:33 Mais i oko oko koue, i ndoye aouali ti i legueoko tonga na tele ti i mveni; na a lingbi ouali a yekia koli ti lo.

1 Corinte 7:3 A lingbi koli a mou ye ti ouali ti lo na lo, na ouali a mou ye ti koli ti lo na lo nga.

1 Corinte 7:34 Tonga so nga, ouali so a yeke na koli pepe, na machia, ala djia be ti ala na ye ti Seigneur, si ala ga ndjoni-koue na tele na yingo nga; mais ouali so a kamata koli aoue, lo qui be ti lo na ye ti sesse so ti mou nguia na koli ti lo.

Colosses 3:18 Aouali, i ma tene ti akoli ti i, teti ye so a lingbi na ya Seigneur.

1 Timothée 2:11-15 Djia ouali a manda ye na legue ti douti kpo na ti ma tene koue. 12 Mais mbi ye ouali a fa nda ti tene ouala a commandé koli pepe, mais lo douti kpo. 13 Teti Nzapa A sala Adam kodjoni, na ndani Lo sala Eve; 14 na Adam a ma handa pepe, mais ouali ni a ma handa na lo ti na legue ti kengo-ndia. 15 Mais fade a sau ouali ni na legue ti douango-melengue, tonga na lo douti na ya mabe, na ndoye, na lo bata tele ti lo nde teti Nzapa, na legue ti ndara ti bata tele ti lo.

Genesis 3:16 Lo tene na ouali ni, Fade Mbi sala si tele ti mo a so na la ni so mo yeke na ngô, na fade tele ti mo a so ngangou mingui na la ti douango-melengue. Fade nzala ti koli ti mo a sala mo na fade lo commandé mo.

1 Pierre 3:1,2 Legueoko tonga so, i aouali, i ma yanga ti akoli ti i mveni, sitonga na ambeni koli a ke Tene ni, a lingbi ouara ala teti Nzapa, na legue ti tene pepe mais na legue ti tambela ti aouali ti ala, 2 aouali so a bata tele ti ala na a kpe mbito ti akoli ti ala.

Tite 2:1-5 Mais mo fa tene so a lingbi na ndjo tene. 2 A lingbi ambakorokoli a kanga nzala ti tele ti ala, ala douti na donji, ala bi be ti ala na legue ni; ala kpingba na mabe, na ndoye, na benze-pepe. 3 Tonga so nga, a lingbi ambakoro ouali a tambela tonga na ajo ti be-voulou, a lingbi ala kougno jo pepe, ala ga amgba ti vin pepe, na ala fa legue ti ye so a yeke ndjoni; 4 tonga so ala lingbi oua apendere ouali ti ndoye akoli ti ala, ti ndoye amelengue ti ala, 5 ti bi be ti ala na legue ni, ti bata tele ti ala, ti sala koussala ti da ti ala, ti sala ndjoni, na ti ma yanga ti akoli ti ala mveni, tonga so zonga a ga na ndo Tene ti Nzapa pepe.

**Aproverbe 12:4 Ouali so a lingbi, lo yeke couronne ti koli ti lo,
Mais ouali so a sala ye ti kamela, lo yeke tonga na ye ti foutina
ya bio ti koli ti lo.**

**Aproverbe 14:1 Aouali ti ndara koue a sala da ti ala, Mais aouali ti
bouba a fa' da ti ala na sesse na maboko ti alamveni.**

**Aproverbe 19:13 Melengue ti bouba a yeke ye ti voundou na baba
ti lo, Na guingo tene ti ouali a yeke tonga na ngou so a yourou
lakoue.**

**Aproverbe 21:9 A yeke ndjoni aho ti douti na mboundou ti ndoda,
Aho ti douti na kota da na ouali so a gui tene mingui.**

**Aproverbe 21:19 A yeke ndjoni aho ti sala kodro na yando, Aho ti
douti na ouali ti ngonjo so a gui tene mingui.**

**Aproverbe 25:24 A yeke ndjoni aho ti douti na mboundou ti ndoda,
Aho ti douti na kota da na ouali so a gui tene mingui.**

**Aproverbe 27:15,16 Ouali so a gui tene mingui, Lo yeke tonga na
ngou so a yourou na la ni so ngou a pika. 16 Jo so a gui legue
ti gbandji lo, lo gui legue ti gbandji poupou, Na maboko ti lo ti
koti a gui legue ti gbo mafouta.**

**Aproverbe 31:10-31 Jo gne a ouara ouali so a lingbi. Nguele ti lo a
ho nguele ti téne ti nguinza mingui. 11 Koli ti lo a djia be ti lo
na lo, Na fade koli ni a manqué ti ouara faïda pepe. 12 Lo sala
ndjoni na koli ti lo, lo sala sioni na lo pepe, Na la ti fini ti lo
koue. 13 Lo gui koua ti ngassangbaga na lin, Na lo sala
koussala na maboko ti lo na be ti nglua. 14 Lo yeke tonga na
bateau ti acommerçant; Lo kamata kobe ti lo na yongoro ndo,
lo ga na ni. 15 Lo loundou kodjoni si nda a de, Lo mou kobe na
ajo ti da ti lo, Na lo fa na aboy-ouali ti lo koussala ti ala. 16 Lo**

bi be ti lo na mbeni yaka, na lo vo yaka so; Na lo lou yaka ti vigne na ye so lo ouara na legue ti koussala ti maboko ti lo mveni. 17 Lo you ngangou na mbounda ti lo tonga na ceinture, Na lo sala si ti ti lo a kpingba. 18 Lo ba ye so lo ouara a yeke ndjoni; Na bi, lampe ti lo a mingo pepe. 19 Lo djia maboko ti lo na keke ti pe kamba, Na maboko ti lo a gbo keke ti kanga kamba da. 20 Lo ye maboko ti lo, lo mou ye na aouanzinga; Lo ye maboko ti lo, lo sala na ajo so ye a manqué ala mingui. 21 Mbito ti neige a sala lo pepe tene ti ajo ti da ti lo, Teti ajo ti da ti lo koue a you bongo ti bingba. 22 Lo sala couverture ti tapis teti lo mveni; Bongo ti lo a yeke ti lin ti ndjoni na ti pourpre. 23 Na yanga ti kodro, ajo a hinga koli ti lo Tonga na lo douti na popo ti akota jo ti sesse ni. 24 Lo sala bongo ti lin, na lo ka bongo ni, Na lo mou ceinture na acommerçant ti ka. 25 Ngangou na yango-iri a yeke bongo ti lo; Na lo he nguia teti ye so fade a ga mbeni la. 26 Lo lounguela yanga ti lo ti sala tene na ndara; Ouango-tene ti be-ndjoni a yeke na yanga ti lo. 27 Lo bata ye ti da ti lo ndjoni, Na lo te kobe na legue ti koussala ti goygoy pepe. 28 Amelengue ti lo a loundou, ala di iri ti lo, ouali so a yeke na nguia, Na koli ti lo nga a sepala lo, lo tene, 29 Aouali mingui a sala koussala ndjoni, Mais mo ho ala koue. 30 Gango ndjoni na le ti ajo a yeke ye ti ouataka, na pendere ti tele a yeke sengue sengue, Mais ouali so a kpe mbito ti L'Eternel, fade ajo a sepala lo. 31 Mo mou na lo ye so lo ouara na legue ti koussala ti maboko ti lo, Na fade tâ koussala ti lo mveni a sepala lo na yanga ti kodro.

**Pastor T. John Franklin
Church of Salvation, Healing, and Deliverance
COS-HAD.org**